



26/12/2008 (Jumaat)

MPOB digesa tamat lesen penimbang sawit swasta

-BANDAR JENGKA Jawatankuasa Persepakatan Bersama (JCC) Kilang Sawit Seroja Jengka 18 mendesak Lembaga Minyak Sawit Malaysia (MPOB) supaya menamatkan segera lesen penimbang swasta di Jengka bagi menangani masalah kecurian sawit.

Jawatankuasa itu mendakwa, kejadian curi kelapa sawit tersebut dilakukan penimbang luar dengan menggunakan nama koperasi tertentu. Setiausaha JCC kilang tersebut, Kamaruddin Hassan berkata, antara yang dapat dikesan ialah beberapa penimbang sawit dari Felda Siantan Jengka 19, yang didakwa membeli buah sawit curi. "Penimbang luar ini dianggap duri dalam daging kerana pihak terbabit membeli buah tandan segar tanpa mempedulikan kualiti buah sawit berkenaan. "Sehubungan itu, hasil mesyuarat ketua-ketua peneroka hari ini, kita menggesa MPOB supaya menamatkan lesen penimbang luar dan hanya memperbaharunya selepas akhir tahun ini," katanya.

Kamaruddin berkata demikian kepada Utusan Malaysia selepas mesyuarat khas JCC Kilang Sawit Seroja Jengka 18, di Felda Wilayah Jengka, di sini semalam. Sementara itu, Ketua Peneroka Felda Sena Jengka 16, Ismail Abdul Rahman berkata, MPOB tidak sepatutnya meluluskan permohonan penimbang swasta walaupun menggunakan nama koperasi di rancangan Felda kerana ia hanya mendorong kes kecurian sawit.

27/12/2008 (Sabtu)

Kerajaan beri perhatian bantu pekebun getah

ALOR GAJAH 27 Dis. - Perdana Menteri, Datuk Seri Abdullah Ahmad Badawi berkata, kerajaan akan memberi perhatian dan pertimbangan yang sewajarnya bagi membantu pekebun kecil getah yang terpaksa menanggung kerugian berikutan kejatuhan harga komoditi berkenaan. Bagaimanapun, beliau berkata, bentuk keputusan yang akan dibuat oleh kerajaan itu belum lagi ditetapkan.

"Turunnya harga getah ini adalah sesuatu yang kepada kita menjadi perkara yang penting diberi perhatian," katanya kepada pemberita selepas melawat D-Paradise Tropical Fruit World & Aboriginal Native Village dekat sini hari ini.

Perdana Menteri diminta mengulas mengenai komoditi utama negara iaitu sawit dan getah yang mengalami kejatuhan harga sejak pertengahan tahun ini berikutan kemelesetan ekonomi dunia, menyebabkan permintaannya berkurangan.

Harga Getah Standard Malaysia (SMR) 20 umpamanya susut sebanyak 62 peratus daripada RM10.51 sekilogram pada 3 Julai lepas kepada RM3.98 sekilogram pada pertengahan bulan ini manakala bulan ini, harga getah beku di peringkat ladang paling rendah iaitu RM1.39 sekilogram. Keadaan itu menimbulkan rungutan pekebun kecil khususnya pekebun getah yang mengharapkan kerajaan melakukan sesuatu bagi membela nasib mereka yang telah terjejas teruk.

Perdana Menteri dan isteri, Datin Seri Jeanne Abdullah meluangkan masa kira-kira dua jam bermula pukul 11.45 pagi melawat dusun berkenaan yang berkeluasan 67.2 hektar.

Turut sama ialah Ketua Menteri, Datuk Seri Mohd. Ali Rustam dan isteri, Datin Seri Asmah Abdul Rahman. Terdapat kira-kira 800 spesies pokok buah-buahan dan sayur-sayuran ditanam di kawasan dusun itu yang menjadi tarikan utama. Selain itu, kehidupan perkampungan Orang Asli juga menjadi tarikan kepada mereka yang ingin mengenali dengan lebih dekat golongan tersebut.

Abdullah dan isteri kemudiannya menaiki bot menyusuri sungai Melaka sejauh kira-kira 4 kilometer dari Taman Rempah di sini untuk melihat keindahan dan pembangunan di kedua-dua belah tebing sungai itu. Pada pukul 8.25 malam ini, Perdana Menteri akan menghadiri majlis Rumah Terbuka Malaysia Krismas 2008 di Perkampungan Portugis di sini.

27/12/2008 (Sabtu)

Lebih 2,000 bimbang tanah di flat mendap

Oleh ASSIM HASSAN



Ramesh Arunasalem menunjukkan kawasan tanah jerlus di flat F, Flora Damansara, Petaling Jaya, semalam.

- Gambar ZULAZHAR SHEBLEE

PETALING JAYA 27 Dis. - Lebih 2,000 penghuni Flat F, Flora Damansara di sini dilanda kebimbangan apabila sebahagian kawasan tempat letak kereta flat berkenaan mengalami mendapan sedalam 1.6 meter sejak dua bulan lalu. Penduduk mendakwa mereka telah melaporkan perkara tersebut kepada pihak berkuasa tetapi sehingga kini tiada sebarang tindakan sewajarnya diambil untuk membaik pulih kerosakan. Mereka bimbang jika perkara itu berlanjutan, ia boleh mengundang kejadian yang tidak diingini hingga meragut nyawa.

Salah seorang penduduk, **Ramesh Arunasalem**, 26, berkata, kejadian itu dipercayai berlaku kerana tiada saliran air yang teratur di sekitar flat dan di kaki bukit di kawasan berkenaan. Jelasnya, perkara itu telah dimaklumkan kepada pihak pemaju, bagaimanapun tiada tindakan susulan diambil. "Pemaju ada berjanji akan membaik pulih saliran dan penakungan air berhampiran kawasan letak kereta flat ini tetapi kos pembiayaan perlu ditanggung bersama antara penduduk dan pemaju. "Bagaimanapun, sehingga kini tiada apa-apa tindakan daripada pihak pemaju jika benar mereka (pemaju) ingin membaik pulih sistem saliran flat berkenaan," katanya ketika ditemui *Mingguan Malaysia* di sini hari ini.

Ramesh yang juga ahli jawatankuasa flat berkenaan berkata, penduduk di kawasan tersebut turut terkejut apabila menyedari terdapat longkang bawah tanah ekoran mendapan tersebut.

Seorang penghuni **Mazhar Mahathir**, 31, turut melahirkan rasa bimbang terhadap apa yang mereka hadapi sekarang. Katanya, selepas kejadian tanah runtuh di Bukit Antarabangsa, penghuni di semua kediaman di lereng bukit semakin bimbang dengan tahap keselamatan rumah masing-masing. "Kadang-kala saya rasa selamat sebab lereng-lereng bukit itu telah disimen tetapi apabila hujan lebat, kebimbangan itu muncul kembali," katanya.

Tambah Mazhar, pihak pemaju tidak sepatutnya hanya memikirkan keuntungan semata-mata sebaliknya aspek keselamatan seperti saliran yang teratur seharus dipandang serius ketika membina flat dahulu. "Ini kerana kami turut membayar kos penyelenggaraan RM100 hingga RM150 setiap bulan," katanya.

Selain itu, menurut seorang peniaga **Sharil Abdullah**, 28, walaupun tidak tinggal di flat berkenaan, dia sering terdengar rungutan penduduk yang mengeluh dengan tahap saliran air di flat tersebut. "Saya cari makan dekat sini, semestinya saya risau jika berlaku mendapan tanah ekoran takungan air dan tiada saliran yang teratur," ujarnya.

Sementara itu, jurucakap bomba berkata, pihaknya menerima panggilan kira-kira pukul 11 pagi dan lapan anggota dari balai Bomba dan Penyelamat Damansara bergegas ke tempat kejadian. Jelasnya, siasatan awal mendapati berlaku mendapan tanah di bahagian tempat letak kereta Flora Damansara yang berukuran 1.3 meter persegi sedalam 1.6 meter berpunca daripada saluran najis pecah dan air bukit.

29/12/2008 (Isnin)

Projek terlalu hampir dengan rumah

KUALA LUMPUR 29 Dis. - Penduduk Taman Sri Kuching di Jalan Kuching di sini membantah pembinaan sebuah projek komersial yang didakwa terlalu hampir dengan kawasan penempatan penduduk. Mereka berkata, kawasan kediaman mereka bakal diganggu dengan bunyi bising dan debu apabila projek tersebut mula dilaksanakan pada awal bulan Januari ini.

Penduduk juga mendakwa projek itu tidak sesuai dilaksanakan di situ kerana tapak projek itu terlalu sempit untuk bangunan yang bakal dijadikan pusat beli-belah dan tempat letak kereta. Selain itu, projek berkenaan boleh mengakibatkan jalan keluar dan masuk ke kawasan perumahan tersebut turut terjejas.

Tinjauan *Utusan Malaysia* ke lokasi tersebut mendapati jalan masuk dan keluar ke kawasan perumahan tersebut sempit akibat kedudukan pagar yang terlalu rapat dengan jalan ke kawasan perumahan berkenaan. Penduduk mendakwa, sebelum ini jalan itu adalah jalan dua hala namun setelah pagar berkenaan dipasang, jalan ke kediaman tersebut menjadi satu hala sahaja. Apa yang dibimbangkan, masalah tersebut akan bertambah rumit sekiranya projek pembinaan berkenaan dimulakan kelak memandangkan jalan itu akan digunakan oleh kenderaan berat. Wakil penduduk yang ditemui, Y.C. Yong, 43, berkata, projek berkenaan dilaksanakan tanpa mengambil pandangan penduduk di sekitarnya. Katanya, sebelum ini, penduduk pernah menulis surat kepada Dewan Bandaraya Kuala Lumpur (DBKL) untuk mengetahui status tanah berkenaan.

DBKL kemudian memaklumkan kepadanya pada awal tahun lalu bahawa tanah berkenaan telah bertukar status kepada komersial dan sekali gus membolehkan pembangunan dijalankan. "Penduduk hanya mengetahui tanah tersebut berstatus komersial apabila kawasan berkenaan mula dipagar oleh pemaju baru-baru ini," katanya pada sidang akhbar di Taman Sri Kuching di sini hari ini. Tambahnya, masalah jalan sempit berkenaan menyebabkan kenderaan sukar untuk keluar dan masuk, malah lori sampah turut mengalami kesukaran untuk menjalankan tugas.

"Jalan untuk memasuki kawasan ini telah disempitkan menjadi satu hala sahaja dan bayangan sekiranya pembinaan tersebut dimulakan kelak, pastinya menambahkan kesulitan kepada penduduk. "Sebelum ini penduduk sudah mengadu masalah lori sampah tidak boleh berpusing balik setelah melalui jalan berkenaan dan terpaksa mengundur sahaja untuk keluar dari kawasan ini tetapi nampaknya aduan itu tidak diendahkan," jelasnya.

Tambahnya, sekiranya berlaku kebakaran, pastinya jentera bomba sukar untuk masuk ke kawasan berkenaan. Sementara itu, Ahli Parlimen Segambut, Lim Lip Eng berkata, tindakan DBKL yang tidak memaklumkan kepada penduduk tentang penukaran status tanah berkenaan amat dikesali. Jelasnya, projek berkenaan bakal menyebabkan kesesakan lalu lintas di kawasan berkenaan. "Sekiranya projek berkenaan diteruskan pastinya kawasan ini bertambah sesak memandangkan jumlah penduduk di kawasan ini juga padat."

29/12/2008 (Isnin)

'Kami mahu Pantai Punggai diberi perhatian'



Tepian Pantai yang indah namun tiada pengunjung.

PENGERANG 29 Dis. - Pantai Punggai yang terpinggir daripada kunjungan pelancong perlu dipromosikan secara agresif bagi memajukan kawasan berkenaan. Rata-rata penduduk tempatan dan peniaga yang ditemui bersetuju agar kerajaan negeri dan Lembaga Kemajuan Johor Tenggara (Kejora) berusaha untuk menaikkan nama pantai itu. Mereka mendakwa kawasan pembangunan sepanjang Pantai Punggai itu terletak di bawah seliaan Kejora.

Seorang penduduk, **Subahir Sodikan**, 42, berkata bagi meningkatkan populariti Pantai Punggai, kerajaan negeri dan Kejora perlu mencari inisiatif luar biasa untuk mempromosikan pantai tersebut. "Sebagai cadangan, pelbagai program nasional dan tempatan boleh dianjurkan di sini bagi menggalakkan pengunjung datang ke pantai ini. "Selain itu, Kejora juga perlu menaik taraf kemudahan-kemudahan di sini bagi memberi keselesaan kepada pelancong. "Apabila pengunjung semakin ramai, sudah pasti gerai-gerai makanan akan tumbuh seperti cendawan selepas hujan," katanya.

Menurutnya, keindahan pantai itu wajar disebarluaskan kepada orang ramai kerana percaya ia mempunyai potensi besar untuk maju dan boleh dijadikan tarikan utama pelancong dari dalam dan luar negara. Katanya, Pantai Punggai memerlukan publisiti yang lebih agresif dengan bantuan pelbagai pihak termasuk media sama ada elektronik dan cetak. "Saya rasa Pantai Punggai hampir tiada publisiti langsung dan inilah punca kurangnya kehadiran pengunjung.

"Walaupun pantai ini dikatakan tidak mempunyai tarikan seperti Desaru dan Batu Layar, namun ia masih mempunyai keistimewaan tersendiri seperti faktor permukaan pantai yang landai," ujarnya.

Seorang lagi penduduk, **Abdul Rahman Abdul Manan**, 56, memberitahu, pembangunan Pantai Punggai hanya bermula sejak dua tahun lalu berbanding sebelum ini apabila keadaan pantainya penuh dengan semak-samun. Katanya, pembangunan yang dilakukan oleh pihak berkuasa perlu seimbang dengan pantai lain agar tidak ada kawasan yang dipinggirkan.

"Kawasan lain seperti Tanjung Sepang sudah pun membangun dan saya berharap Pantai Punggai akan mengalami pembangunan pesat pada masa akan datang," katanya.

Bagi seorang peniaga, **Saujana Abdul Hamid**, 40, pembangunan infrastruktur di Pantai Punggai jelas berbeza jika dibandingkan dengan Desaru yang terlalu diberikan keutamaan. Jelasnya, Pantai Punggai sepatutnya menjadi alternatif kepada pantai jiran-jirannya agar kerancakan ekonomi dapat dikongsi bersama. "Hari ini, pengunjung tempatan dan asing lebih mengenali pantai Desaru dan pantai Batu Layar.

"Padahal, keindahan Pantai Punggai tidak ada kurangnya malah setanding dengan pantai lain. Justeru, Kejora mungkin boleh melakukan sesuatu untuk menaikkan nama pantai ini pada masa akan datang," katanya.

30/12/2008 (Selasa)

LPP tumpu usaha pulih tanah sawah terbiar

SIK Lembaga Pertubuhan Peladang (LPP) akan memberi tumpuan pada tanaman padi dan beberapa tanaman lain dalam memulihkan tanah sawah yang terbiar selain menjadikan golongan muda sebagai kumpulan sasar. Ketua Pengarah LPP, Datuk Abdul Rahim Ahmad berkata, usaha pemulihan itu lebih disasarkan kepada golongan generasi baru bagi membantu mereka menjana pendapatan tetap dan sampingan. Katanya, ia juga akan memudahkan penggunaan teknologi terbaru dengan penglibatan lebih ramai golongan muda terhadap usaha berkenaan.

"Kita mahu memberi tumpuan pada usaha pemulihan semula tanah sawah yang berdaya maju melibatkan lebih tumpuan kepada petani muda," katanya ketika ditemui selepas melawat projek ternakan udang galah yang diusahakan oleh 14 penternak muda di Kampung Bukit Batu Belanik dekat sini kelmarin. Menurut Abdul Rahim, LPP tidak memberi fokus pada sesuatu tanaman sebaliknya bersedia membantu petani yang ingin mengusahakan projek tertentu yang memberi pulangan lumayan untuk jangka panjang. Beliau memberikan contoh projek mini estet padi dan ternakan udang galah yang begitu berpotensi besar jika diusahakan secara berkelompok.

Abdul Rahim berkata, golongan penoreh juga boleh menambah pendapatan sehingga RM500 sebulan melalui pemulihan tanah sawah. Katanya, usaha memulihkan tanah sawah terbiar akan membantu kerajaan melaksanakan program meningkatkan hasil pengeluaran padi negara.

"Sehingga kini lebih 300 hektar tanah sawah sedang dibangunkan dengan projek mini estet padi di daerah Sik ini," katanya. Jelasnya, sebanyak 70 hektar kawasan sawah terbiar di Tanjung Belit dan Chepir akan mengeluarkan hasil padi tidak lama lagi.

30/12/2008 (Selasa)

Lagi bangunan kerajaan bocor

PUTRAJAYA 30 Dis. - Hampir seluruh tempat letak kereta di aras B1 dan B2 bangunan Jabatan Penerbangan Awam (DCA) di Presint 3 di sini digenangi air hingga paras buku lali dipercayai akibat bumbung bocor.

Presiden Perbadanan Putrajaya (PPj), Tan Sri Samsudin Osman yang terkejut dengan situasi berkenaan berkata, kejadian itu mungkin berpunca daripada kebocoran pada bumbung bangunan yang kini dalam proses penyelenggaraan.

Utusan Malaysia difahamkan, ini kali pertama bumbung bangunan pejabat berkenaan mengalami kebocoran sejak ia digunakan lima tahun lalu.

"Saya mahu pihak terbabit segera menyiasat kejadian itu dan mengambil tindakan sebelum beberapa lagi bangunan kementerian lain mengalami masalah yang sama," katanya ketika dihubungi hari ini.

Sementara itu, tinjauan *Utusan Malaysia* mendapati air mula bertakung di aras B1 sebelum menitis ke aras B2, mengakibatkan air bertakung di kedua-dua kawasan tempat meletak kenderaan yang terletak di Podium A.

Air kelihatan masih keluar dari beberapa kawasan bumbung apabila air yang bertakung di aras B1 menitis ke aras B2.

Ini kali kedua kejadian bumbung bocor di Putrajaya berlaku bulan ini selepas sebahagian besar Auditorium Cempaka Sari, Kompleks PPj digenangi air akibat bumbung bocor pada 11 Disember lalu.

Kejadian tersebut berlaku ketika forum Ketidaktentuan Kewangan Global dan Masa Depan Malaysia, yang dihadiri kira-kira 600 tetamu termasuk Raja Muda Perak, Raja Dr. Nazrin Shah dan bekas Perdana Menteri, Tun Dr. Mahathir Mohamad, sedang berlangsung.

30/12/2008 (Selasa)

RM217 juta projek tebatan banjir Sibu

SIBU 30 Dis. - Masalah banjir kerap berlaku di pusat bandar ini terutama semasa musim tengkujuh dengan terbaru Khamis lalu, apabila hujan lebat menyebabkan paras air naik 0.3 meter sehingga menenggelamkan beberapa batang jalan utama. Tinjauan *Utusan Malaysia* mendapati jalan paling terjejas ialah Jalan Stabau, Jalan Lanang, Jalan Pedada, Jalan Kampung

Nyabor, Jalan Bukit Assek, Jalan Tong Sang, Jalan Hoe Ping, Jalan Hardin Walk, Jalan Foochow, Jalan Tiong Hua dan Jalan Mui Hong. Walaupun keadaan itu pulih dengan segera, Kerajaan Persekutuan tidak memandang ringan masalah yang dihadapi rakyat apabila memohon peruntukan tambahan RM80 juta menerusi Kementerian Perumahan dan Kerajaan Tempatan bagi membayai projek tebatan banjir di bandar ini.

Timbalan Menterinya, Datuk Robert Lau Hoi Chew berkata, Kementerian Sumber Asli dan Alam Sekitar pula telah menyediakan peruntukan RM137 juta untuk tujuan yang sama. "Sistem perparitan yang kurang baik menyumbang kepada banjir kilat yang berlaku di bandar ini terutama ketika musim tengkujuh seperti sekarang. "Peruntukan terbabit akan digunakan untuk menambah baik sistem perparitan yang tersumbat atau sempit di samping meninggikan jalan raya di kawasan kerap berlaku banjir," katanya pada majlis pelancaran Kempen Hari Cintai Bumi di sini, baru-baru ini.

Menurut Robert Lau, banjir berlaku di bandar ini apabila kawasan hulu Batang Rejang seperti Kapit dan Song menerima kadar hujan yang banyak. Katanya, paras air Batang Rejang akan naik apabila bandar Sibu juga menerima taburan hujan yang banyak. "Air hujan yang mengalir ini apabila bertemu dengan kejadian air pasang di Sibu telah menyebabkan banjir berlaku di bandar ini," jelas beliau.

Bandar Sibu dinaiki air kira-kira 0.3 meter yang menenggelamkan beberapa batang jalan di pusat bandar bermula Jumaat lalu akibat hujan lebat yang turun pada hari Khamis. Bagaimanapun, keadaan itu kembali pulih sepenuhnya hari ini.

31/12/2008 (Rabu)

Isu kuota UiTM bertukar panas



12 Ogos - Para pelajar UiTM, Shah Alam berarak untuk menghantar memorandum bantahan kepada Tan Sri Khalid Ibrahim mengenai cadangan kuota kemasukan pelajar bukan bumiputera ke institusi itu.

Ogos

1. Lebih 5,000 pelajar Universiti Teknologi Mara (UiTM) berarak sejauh dua kilometer di Shah Alam pada 12 Ogos untuk membantah keras cadangan Menteri Besar Selangor, Tan Sri Abdul Khalid Ibrahim agar 10 peratus kuota kemasukan ke universiti itu dibuka kepada kaum bukan bumiputera.

Siri perarakan bantahan tersebut kemudiannya turut menular ke kampus UiTM di lain-lain negeri yang melambangkan kesatuan para pelajar dalam menghadapi isu tersebut.

2. Tiga bahagian baru di Kementerian Pelajaran ditubuhkan iaitu Bahagian Pengurusan Sekolah Berasrama Penuh dan Sekolah Kluster, Bahagian Psikologi dan Kaunseling dan Unit Pengurusan Sumber Manusia.

3. Bajet 2009 - Peruntukan RM31 bilion diperuntukkan kepada Kementerian Pelajaran melalui Bajet 2009 sekali gus peruntukan telah ditambah sebanyak RM1.8 bilion berbanding tahun lalu.

Oktober

1. Sebanyak 233 guru besar dinaikkan pangkat kepada gred DG44 iaitu angka terbesar rekod kumpulan pertama guru besar dinaikkan pangkat sebagai guru besar siswazah dari gred DG41 ke DG44.

2. Empat pelajar Sekolah Menengah Kebangsaan (SMK) Perlis yang terlibat dalam dua kes disiplin dikenakan hukuman buang sekolah oleh Jawatankuasa Disiplin dan Tatatertib sekolah berkenaan.

Mereka yang menerima hukuman ialah seorang pelajar perempuan tingkatan dua yang memukul dan menendang seorang guru selepas ditegur mengenai kata-kata kesat yang ditulis dalam buku kerja kursus pada 16 Oktober lalu.

Manakala tiga lagi yang dikenakan hukuman buang sekolah merupakan pelajar tingkatan empat dan lima sekolah sama yang terlibat dalam pergaduhan berkumpulan empat hari selepas kejadian guru dipukul.

November

1. Kurikulum baru untuk Sekolah Agama Rakyat (SAR) akan diperkenalkan bersesuaian dengan perkembangan semasa tidak lama lagi sejajar dengan pengambil alihannya oleh kerajaan pusat.

2. Mata pelajaran Teknik dan Vokasional bermula dari tingkatan satu akan diperkenalkan di semua sekolah menengah pada 2010.
3. Hab Pendidikan Bersepadu di Nilai 2010 - Fasa pertama projek bersepadu hab pendidikan di Nilai, Negeri Sembilan yang bakal menempatkan beberapa institusi pendidikan utama dijangka siap menjelang tahun 2010.

Disember

1. Rombakan pendidikan sekolah rendah 2010 - Mata pelajaran Sejarah akan dipertimbangkan kewajaran menjadikannya sebagai salah satu mata pelajaran khusus.
2. Menjelang 2010 peperiksaan awam dinilai dengan pemberat markah yang direndahkan iaitu markah peperiksaan untuk Ujian Pencapaian Sekolah Rendah (UPSR) tinggal 30 peratus, Penilaian Menengah Rendah (PMR) 50 peratus dan Sijil Pelajaran Malaysia (SPM) pula, 70 peratus.